

摘錄司馬氏居家雜儀 明邱瓊山先生輯

凡人居所以正倫理篤恩愛者皆本於此必
能持行然後可觀不然節文雖具本實全無君
子弗貴也故特編入使覽者知所先焉

家長

凡爲家長必謹守禮法以御羣子弟及家眾分之以
職授之以事而責其成功制財之節量入爲出稱家
有無上下衣食及吉凶費用皆有品節莫不裁省冗
費禁止奢華常須稍存贏餘以備不虞

卑幼

凡諸卑幼事無大小母得專行必咨稟於父母家長如無父母而有家長者亦當咨稟而行則號令出於一人而家政肅矣

子婦不敢自私

凡爲子爲婦者母得蓄私財俸祿及田宅所入盡歸之父母舅姑當用則請而用之不敢私假不敢私與夫人子之身父母之身也身且不敢自有況私財乎若父子異財互相假借則是有子富而父母貧者父母飢而子飽者賈誼所謂借父耰鉏慮有德色母取箕帚立而諄語不孝不義孰甚於此

子婦不敢自逸

凡子事父母婦事舅姑天欲明咸起盥漱櫛總具冠帶味爽適父母舅姑之所省問父母舅姑起子供藥物婦具晨羞供具畢乃退各從其事將食婦請所欲於家長退具而供之尊長舉筯子婦乃各退就食丈夫婦人各設食於他所依長幼而坐其飲食必均一幼子又食於他所亦依長幼席地而坐男坐於左女坐於右及夕食亦如之旣夜父母舅姑將寢則安置而退居閒無事則侍於父母舅姑之所容貌必恭執事必謹言語應對必下氣怡聲出入起居謹扶衛之

不敢涕唾喧呼於父母舅姑之側父母舅姑不命之坐不敢坐不命之退不敢退

受父母命

凡子受父母之命必籍記而佩之時省而速行之事畢則返命焉或所命有不可行者則和色柔聲據是非利害而白之若不許苟於事無大害者亦當曲從若以父母之命爲非而直行己志雖所執皆是猶爲不順之子况未必是乎

男女分別內外

凡爲宮室必辨內外深宮固門內外不共井不共浴

室不共廁男治外事女治內事男子晝無故不處私
室婦人無故不窺中門男子夜行以燭婦人有故出
中門必擁蔽其面男僕非有繕修及有大故不入中
門入中門婦人必避之不可避亦必以袖遮其面女
僕無故不出中門有故出中門亦必擁蔽其面

教子嬰孩

凡子始生若爲之求乳母必擇良家婦人稍溫謹者
子能食飼教以右手子能言教以自名及唱諾萬福
安置稍有知則教以恭敬尊長有不識則嚴訶禁之
古有胎教况於已生子始生未有知固舉以禮况於

已有知孔子曰幼成若天性習慣如自然不可不使之知尊卑長幼之禮若侮詈父母毆擊兄弟父母不加訶禁反笑而獎之彼既未辨好惡謂禮當然及其既長習以成性乃怒而禁之不可復制於是父疾其子子怨其父殘忍悖逆無所不至蓋父母無深識遠慮不能防微杜漸溺於小慈養成其惡故也若既長則皆責以成人之禮不得復言童幼矣

婦人三從之道

孔子曰婦人伏於人也是故無專制之義有三從之道在家從父適人從夫夫死從子女及笄日處閨門

之內不百里而奔喪事無擅爲行無獨成參知而後動可驗而後言晝不游庭夜行以火所以正婦德也

女有五不取

逆家子不取亂家子不取世有刑人不取世有惡疾不取喪父長子不取

婦有七去有三不去

凡婦不順父母去無子去淫去妒去惡疾去多言去竊盜去有所取無所歸不去與更三年喪不去前貧賤後富貴不去